

Mitefos

Kaemang ho, manikaw ko 'orip no malitengay itiya, matayal a makerih ko finawlan misakoli talacowacowa a milifon, nga' saka iraaw ko payci no loma' sapa'aca to maamaan. Tadanikaw no loma' itiya, awa ko cecace:cay a rimood a payci sapafeli to wawa a mi'aca to 'odax, harateng han anini kasini'adaan to ko itiyaay a wawa.

Mansa, ya maamaanan a falo no losay, no caleng, no kilang, no rengos i, ano caka patay a kaenen i, makaen to no misa'Amisay a tamdaw.

O wina ato wama mararid masacefang to niyaro'ay a malitengay, tayra pitefosan a milifon mitefos, matooray no mako mihakelong a tayra i pitefosan, ya mitooray i pitefosan a kaemangay i, sacefacefang sa misalama, sakimokimor sa matayal ko malitengay mitefos, pakomira han ko wawa a paresap i pitefosan i seraseraan, o cima ho ko misikolay.

Ano mitaelif koya tomes sanay to tefos a paliding i, comikay to a mihodoc to tefos no paliding ko kami a kaemangay ma'emin. “ Halikien mihodoc, hacikayen no mita mimokmok tayra i tenok no pitefosan. ” sa mitoro' a mipakafana' ciLaway kaka, limek sa to i tenok no tefotefosan misatapang to komaen to tefos kami mapolong, aciyah ko 'aredet nora tefos,

aciyah ko ko'esana nora tefos, tahanini ko ko'esana ko lipahak ko kahemek i faloco'.

“ Mimaanay kamo itini, taring sa ko tolak no tefos, awa kamo macepet no kincac no tailangan anosawni, aka itini minokay to! ” sa ko wina niDiway miceli' tamiyanan to talaw to kacepet niyam, mada'ac ko pikaen to tefos niyam, sahali:ki han mipafetfet to cikay a milaliw.

Sio'ol ko 'afalaan, si'alopaynay ko oo' no malitengay to lalok a milifon itiya, palifon ko tawki i dadaya to nakaharekan no romi'ad i, sacecacecay sa matatongotongod a milayap to palifon no tawki to 20 rimood a payci to naromi'adan. Hatiraay ko malitengay no mita malalok a milifon mitefos tahira i picereman no cidal.

Hatiniay ko 'icel no malitengay ita a patireng to loma', palahad to wawawawa, o kangodoen no mita, o dadipoten no mita ko malitengay a tahada'oc.

砍甘蔗

小時候艱辛生活，部落普遍不富裕，家長們努力工作以改善家計，孩子們常常沒有零用錢，只能靠自然的果實充當零嘴。與其他孩子一起跟隨父母去砍甘蔗的情景，並在甘蔗園中偷吃甘蔗，享受那份甜美的滋味。雖然有時會被大人喝斥，但這些回憶充滿了童年的快樂與無憂。部落的長輩們辛勤工作，建立了家庭，讓他們深感感激，並表達了對長輩的孝順與守護之心。